



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 7

Yangia anidakangma :

f Tir Yimym


ig tiryimym@aolima

yt tir yimym

TAPAK 8

Putin-i yakta Pyongyang semdangtsü mulunga lir: North Korea

India Open: Tai Tzu Ying-i tetsür kija asaya kokogo



VOL. XXI NO. 99 (ADOK 99) DIMAPUR TENTONÜ (MONDAY) ANJETI (JANUARY) 22, 2024 ₹ 5.00

NSCN-KYA & ULFA-I ajanga R-Day mokdangtsü ayonger

Guwahati, January 21, 2024 (Agencies): NSCN-KYA aser ULFA-I külem sangdong ka nung January 26 Republic Day mokdangba metetdaksüogo. "NSCN/GPRN aser ULFA-I i onok noktakba aser teinyaksütem nungi masetsihii lir. Naga aser Asom nunger pei sasa ketdangsüa aotsü atema raraba aser nüjiso teimla mesama lir" ta parnokisa ashi. Telok anaprongi Assam, Manipur, Nagaland aser Arunachal Pradesh nung Republic Day mokdangtsü ayongzükogo.

agi mongdaksüba benjung mokdangtsü ayongzükör" ta NSCN/GPRN aser ULFA-I ajanga metetdaksü. "Iba anogo nenok kilung nung dang alitsü aser shimo milen tsükloker asen lima asoshi taküm bendanga agütsürtem tushia amongba tajungba" ta parnokisa ashi. Telok anaprongi Assam, Manipur, Nagaland aser Arunachal Pradesh nung Republic Day mokdangtsü ayongzükogo.

Assam BJP züngsemtemi Rahul Gandhi & BJNY anema lungkak ait

Guwahati, January 21, 2024 (Agencies): Assam nung BJP pusemertemi Deobar (January 21) nikonngang Congress lennir Rahul Gandhi aser Bharat Jodo Nyay Yatra anema lungkak aitba sentong tulu ka agiogo. Rupohihat nung Rahul Gandhi-i restaurant ka nung anenzükdang BJP züngsemtemi kima nung lungkak aitba sentong agi. Parnoki anti-Rahul Gandhi aser anti-Bharat Jodo Nyay Yatra placards amer Congress party anema lungkak ait. Lungkak aitba tesem nung mepetmesü madoktsü atema security akangshia liasü. Tanü BJP züngsem kari Assam Congress president Bhupen Borah dak teka sangshia liasü. Iba lendong ya Sonitpur district kübok Jamugurihat nung atalok. Iba mapang Bhupen Borah yiruba osang angazükör. Külen tanü anogo nungsa BJP züngsemtemi Congress lennir Jairam Ramesh indang gari amak. Bharat Jodo Nyay Yatra mapang Sonitpur district kübok Jamugurihat nung iba lendong

atalok. Maneni, Assam kübok Sonitpur district nunga Congress lennirtem amakba osangtem lir. Iba district nung Assam chief minister Himanta Biswa Sarma tenu Superintendent of Police (SP) lir. Congress party-i BJP aser parnok sorkartem metsübur ta metetdaksüogo. Bharat Jodo Nyay Yatra takok anguba atema BJP aser Assam sorkar kanga tsübuteper. Iba ya BJP züngsem telok kati Congress lennir Jairam Ramesh amakba ajanga kuli agütsür ta Congress-i sangdong ka nung metetdaksü. Congress lennirtem amakba ya Assam BJP MLA Padma Hazarika ajanga lir anungji onoki police enquiry dak tamang makar. Onoki judicial probe akhangter" ta Congress-isa metetdaksü. Congress-isa item mapa inyakertem aputsü atema Assam sorkar nem ghonda 24 atakzüktsüogo. BJP-i aniba Assam sorkari aibelenerem pua marutetra lungkak aitba sentongtem agitsü ta parnokisa ashi.

Ram Temple meshitettsü atema Ayodhya security akanga renema lir



Ayodhya, January 21, 2024 (Agencies): Asung Uttar Pradesh kübok Ayodhya nung Ram temple meshitetba benjung atema night vision devices nungi artificial intelligence (AI) adenba CCTV cameras amshia security maparen renema lir. Deobar nungi Pran Pratishtha sentong nung adentsü jaokertem Ayodhya-i arur aser iba anogo atema jila ajungalen naro amshia kanga dang tobur junga renema lir. Maneni, loudspeakers amshia 'Ram dhun' atemer aser yimdong nung Lord Ram, Sita, Lakshman aser Hanuman ama sobur nisungtem senzüteper. "Linük ajungai Lord Ram tenüng tetshir" ta Uttar Pradesh Deputy Chief Minister Keshav Prasad Maurya-i ashi. Ayodhya yimti nung yimdong aser kilem ajak nung saffron flags agi mesangbanga lir aser Lata Mangeshkar Chowk nung Lord Ram den Ram temple noksatem yua lir. Hombar anüngdang 12:20 nungi sentong tongtiba tenzüktsü aser ibaji nikonngang 1:00 ako nung tembangtsü. Prime Minister Narendra Modi-i nisung 7,000 tema

adenshia alidak o jembitsü aser iba sentong ajunga live sayutsü. Ram temple kimong surveillance drones ajanga anüker aser Ayodhya nung 'yellow zone' lateta alidak face-recognition technology adenba AI-based cameras 10,715 yua lir. Maneni, emergency response atema National Disaster Response Force (NDRF) aser State Disaster Response Force (SDRF) mapa lemezükja lir, külen SDRF teams-i Saryu ayong nung boat patrols senzütsü.

UP Special Security Force (SSF)-ia anti-drone system ka tenzükogo aser iba ajanga security nung extra layer ka densemogo. "AI adenba drones den anti-mine drones ajanga Ayodhya anüker" ta police ketdangsür kati ashi. Arun Yogiraj-i yangluba Ram Lalla indang süngyanglu ka Deobarnü Ram temple telung nung yuogo. Iba süngyanglu nung arishi küm 5 tain Ram Lalla lapo naro ka nung noktaka lir.

Ram Temple meshitetba atema pelar: Nagaland Governor

Dimapur, January 21, 2024 (TYO): Ayodhya nung Ram Temple lapokba atema linük aser alima ajungalen benjungteper. Iba ya alima nung Hindu nunger atema kanga dang tongtipang mapa ka lir aser Lord Ram tasodak tekülem ki meshitetba ajanga nisung aika pelateper ta PRO Raj Bhavan, Kohima-i sangdong ka nung metetdaksü. Pre-Prana Pratishtha indang anogo tenetnü külemba ya January 16, 2024 nungi tenzük aser January 21, 2024 nü tembang. Ram Lalla indang Pran Pratishtha ya January 22, 2024

nü agitsü aser PM Narendra Modi-i sentong ketdangsüa agitsü, ta PRO Raj Bhavan-isa metetdaksü. Ram Jambhoomi Temple meshitetba atema Nagaland dena alima ajungalen live-telecast asütsüba den sentongtem ayonga agir. Nagaland Governor-ia iba anogomung nung PWD Kohima nung aliba Hindu Mandir semdangtsü, ta parnokisa ashi. Governor-i nisung ajak moatsür aser iba sentong ajanga asenok tsüngda telongjem aser adianu tangatetba arutsü imlar ta PRO-isa ashi.

7th Mile, Chumoükedima nung nisung 2 tsükset

Dimapur, January 21, 2024 (TYO): January 20, 2024 aonung 9:30 ako meta NH-29 nung 7th mile petrol pump anasa gari lendong ka nung nisung 2 asü. Iba osang angashiba sülen duty officer-i anir duty party ka tesem tonga aodang Alto gari (ASOIND 0904) kati Truck gari (ASOIDD 0958) dak atsükba angu. Police-i osang agitepdang Alto gari nung nisung 2 mener 5th mile leni aodang gari lenmang tezülen aliba truck gari ka dak atsükba angashi ta Dy. Commissioner of Police (Crime) & PRO, Dimapur sangdong ka nung metetdaksü. Iba mapang Alto gari nung mena alisang tsükset aser driver ji CIHSR hospital-i anir orr liasü.



Police duty party-i driver den ajuruteptsü atema mozü kidang ao saka pa süadoker liasü. Iba lendong nung asüba gari driver ji Unity Village nung Kasheto'er jabaso Tovika (31) aser pa den külemi amensangji Tobu town nung T Akai Konyak'er jabaso Erang Konyak

(38) ta jangaogo. CCTV surveillance footages repranga bushisüngdang asüdang Alto gari kanga karara arur lenmang tezülen anena aliba truck gari dak atsükba bushitetogo, ta Dy. Commissioner of Police (Crime) & PRO-isa metetdaksü.

Office of the
RIONGSANGER PUTU MENDEN KELINGMEN
P.O. Changtongya- 798613, Dist. Mokokchung, Nagaland.
Date: 28-01-2023
KHONANG TETUSHI AGÜTSÜR

Kelingmen senso rongnungi Mr. Takoliba Tzüdir aser Mrs. Moamenla (Yimjenkimong) tena jala **Miss T. Tamsünaro Tzüdir**, shibai taoba Luchii (Dec) 22-27, 2023 anogotem nung Noida, Uttar Pradesh lima International Boxing Association (IBA) 1-star Judge and Referee tetoktepa nung Northeast India tetsür rongnungi tanabuba takok ngutetba den, talisa Naga nunger rongnung mezüngbuba iba ama takok tulu ngutetba asoshi jala nem khonang tetushi tulu agütsüba den Tsüngrem tenüng asanger.

Tejkdang anüngdaka aliba wadang balala ajak nung ano maneni Tsüngremi jala taküm yariang ta sarasademtsür.

Sd/-
Imsünüken Jamir
Chairman.



Sd/-
Obendangba Jamir
Secretary.



Senden Reju, Dimapur nung Business Association of Nagas teloki ayongzükba International Trade Expo nung sü atakba, long agenteta noksa yangluba aser tebang agi noksa yangluba mapatem inyaka sayuba noksa nung angur. Tebang agi noksa yanglusa ya arishi kum 25 tain asangur Imlisünep Longkumer lir. Pai pa tetsung aser teka agi mapa junga meinyakteter saka kecha training ka magii pai pa bang agi jenjang tulu aketba noksatem yangluteter. Pa ya Aoyimti, Dimapur nung alir. (Tir Yimyim, January 20, 2024).

CSF-i nübürtem kumzuka meyetetra parnok Manipur nung alitsü menügdak: CM Biren Singh

Imphal, Aenjeti/January 31 (Agencies): Deobarnü 1st Manipur Rifles Parade Ground nung 52 buba Statehood Day anogomung mapang Chief Minister N Biren Singh-i tasü ita Central Security Forces den jembia aser parnok mapa ya state aser tai maket civilian tem wazuka ayutsüba ya lir ta nenshia ashi.

Singh-i state nung Central Security Forces aliba nükjidad indang jembidang, "Nenok ya repranga atatsü atema jaokba masü, nenok ya state integrity aser tai maket nübürtem aser ki o jen wazuka ayutsü asoshi jaokba lir, repranga atatsü atema masü," ta ashi.

Tawa Kuki telungpuri civilian tem dak timtem agütsür

ta temulung melemteti aliba nung sepaitemi kecha mashiba osang prokshia aliba mapang Manipur chief minister-i iba olen ya ashi.

Central Security Forces temi state aser yangji aliba nübürtem kumzuka meyetetra, parnok Manipur nung alitsü nügdak maka, ta CM Biren Singh-i ashi.

"Asenok ajak India nunger! Nenoki kechi angateter? Nenoki kechi asayar? Onoki onok atema telemtetba agitsü," ta pai ashi.

Chief minister den cabinet aser MLA tem anener tang state nung teblemtsü alibatem bentetsü atema Central sorkar nem akhangtsü renema lir ta osang angazüker. Saka iba

pangzüng ya ano tatem kuma telemtetba magiteti lir.

Chief Minister's Secretariat nung tongtipang senden ka amener, kong Cabinet Ministers aser MLAs temi pangzüng takang ka renemer. "Asenoki asen nübürtem kumzuka ayutsüla, nügdak süra nia menden nungi alutsü," ta Singh-i ashi.

Ano külem Meitei socio-cultural organization, Arambai Tengol-i January 24 nü senden ka jazuka lir aser Meitei MLA tem dang Kangla Fort telung nung aliba Kangla Uttara nung adenshitsu ajungshir.

Iba senden nung madenba Minister aser MLA tem Meitei nübür asoshi tsükchir ta züngshitsu, ta iba telok yagi tekumdangtsü shiogo.

Assam Rifles temi sentong balala ayongzuka agi



Dimapur, Aenjeti/January 21 (TYO): Assam Rifles temi sentong ka ayongzuka Tuensang district kübok Hakchang aser Sangsangnyu yimtsung nung alirtem nem Brig Vikram Singh Cdr 7 Sector Assam Rifles ajanga solar lights 370 agüja liasü.

Item lights ya CSR sentong kübok Sunbird Trust aser Schneider Electric Foundation India ajanga agüja liasü.

Item light tajung yagi meta tezulen nübürtem aser kaketshir nem teyari tulu agütsütsü.

Item yimtsungtem nung nübürtem light peria makaba teblemtsü ajemdaktsütsü nükjidad nung iba mera ya agia liasü. Iba sentong ya Assam Rifles, Sun Bird Trust aser Schneider Electric Foundation ajanga nübürtem den lungjemer ayongzuka liasü.

Maneni January 21, 2024 nü Assam Rifles temi Mon district kübok Changlangshu CoB nung 'A Day with Company Commander' nungja agütsür kaketshirtem asoshi sentong ka ayongzuka liasü.

Iba anogo Bumei yimtsung nungi kaketshir 60 den tesayur pezüi Changlangshu nung Company Commander den munga liasü. Iba mapang parnoki Jalebi Race, Tyre Football, Spoon Race, Musical Chair amala asaya tabu balala ayongzuka agi.

Item asaya nung tila tanurtemi tejangraba tulu nung shilem agia takoker nem sempet agüja liasü.

Assam Rifles temi iba ama sentong ayongzükba asoshi tesayur aser kaketshir temi pelaba lemsatepa liasü.

Ram temple meshitettsü atema ajak dang sarasademtsü ayongzükba: CM Sarma

Guwahati, Aenjeti/January 21 (Agencies): Deobarnü Assam Chief Minister Himanta Biswa Sarma-i tamangba yimsü ajunga nungi nübürtem dang Hombar nung Ram temple meshitettsü asoshi balaka sarasademtsü ayongzuka liasü. "Ayodhya nung Lord Ram indang Pran Pratistha ya Hindu yimsü tsütsü takok anguba masü, saka Indian civilisation indang lir. State nung kin balala tsüngta yimjung nung alitsü atema nisung ajaki pei yimya nung sarasademtsüla," ta Sarma-i osangbener senden ka nung ashi.

Paisa state tesem ajunga nung aliba nübürtem dang Hombar nikongdang Ayodhya nung iba tekülem ki meshitetba sülen pei ki, dokan aser business establishment kima milen tsükloktü aser 'namghars' (community prayer halls) semdangtsü ayongzük.

"Pran Pratistha sentong nung tamangba yimsü ajak nungi nübürtem shilem agitsüla. Nübürtem dang tesendaktep tajung nung alitsü ni ayongzükba," ta Sarma-i ashi.

"Tashiyim amshir kati India nunger tekülem ki raksatsü. Babar ya tashiyim amshir ka

liasü. Pai Hindu nunger kisung mamak. British colonialists aser Babar tsüngta kecha mali. Babar ya bendanger tashi liasü," ta Assam CM-i ashi.

Kokra nübürtemi iba tekülemki meshitetba matem tashi lumitsüla, ta ashi.

Hombarnü sorkar offices, dokan aser commercial establishments ajunga anogo tom ka shibangtsü, ta pai ashi.

Government schools, colleges aser university tem shibangtsü aser private educational institutions tema sodi alitsü ajungshir, ta Sarma-i ashi.

Hombarnü asoshi 'dry day' sangdongogo aser 'non-vegetarian' chiyongtsü ayokba dokan tem nikongdang 4:00 ako tashi shibangtsü, ta pai ashi.

Ayodhya nung tasen yangluba Ram temple nung Shri Ram Lala indang Pran Pratistha sentong agitsü anogo ka dang lia iba sentong asoshi terenemshiba tulu nung lir.

Iba sentong nung nisung 8,000 dak tema jaoka lir, saka opposition Indian National Democratic Inclusive Alliance (INDIA) nungi yimten yimsüsürtem madentsü telemtetba agiogo.

Assam nung Congress lenir gari nung timtem agütsü



Guwahati, Aenjeti/January 21 (Agencies): Assam kübok Sontipur district nung mejangjaba nisungtemi Congress lenir Jairam Ramesh indang gari nung timtem agütsü aser 'Bharat Jodo Nyay Yatra' sülen jajaba osangbener mejungi amshi ta Congress-i Deobarnü ashi.

Bharat Jodo Nyay Yatra mapang Rahul Gandhi ya pa mena aliba bus nungi aludang iba ya atalok. Iba timtem ajurudang Rahul Gandhi indang security guard temi pa bus telungi anir ai.

Congress lenir Jairam Ramesh-i X (Twitter) nung ashiba agi, Jumugurihat, Sunitpur nung BJP teloki pa indang gari nung timtem agütsü aser gari nung inoka aliba Bharat Jodo Nyay Yatra indang sticker tem shisatsü.

Parnoki tzü inloktsü aser BJNY anema yimyim ayima liasü. Saka onok süngjemshi aser teka ayiploktür ao, ta pai ashi.

Iba timtem agütsüba nung Assam Chief Minister Himanta Biswa Sarma dena lir, ta Congress leniri ashi.

Supriya Shrinete-ia chief minister dak tai tongloktü aser "Himanta, item shirong mapa anenang, na aser ner telok nungi mapa tamajung inyaker temi Rahul Gandhi indang Bharat Jodo Nyay Yatra

menokdangtetsü," ta ashi. State Congress President Bhupen Bora daka tekolak aser tejemi nung azük ta Congress party-i ashi.

"Jamugurihat anasa Yatra telok tuluba nung adentsü aodang Ramesh aser dangartem gari nung timtem agütsü," ta All India Congress Committee (AICC) communications coordinator Mahima Singh-i osangbener dang ashi.

"Onoki police nem osang agütsü aser tangbo yangji additional superintendent of police arua lir," ta AICC leniri ashi.

Pa (Jairam Ramesh) indang Nyay Yatra sticker tem shisatsü aser gari nung BJP nisan inoktsütsü merang dang gari tesülen aina (glass) tera agi meraksa, ta lai ashi.

"Iba Yatra nung külemi senzür vlogger ka indang camera, badge aser danga osettem rakzük. Party indang social media team nungi züngsemtema mejungi amshi," ta Mahima Singh-isa ashi.

Iba tesem nung BJP sentong ka liasü aser media nisungtem kar aji reprangtsü gari nungi alu. Parnoki onok tsübotsüsa tensa adokdaktü. Parnoki vlogger indang camera meyipa agütsütsü memulung aser ibai rakzükba masü ta ashi, ta laisa ashi.



January 21, 2024 nü New Delhi nung taruba Republic Day Parade nung shilem agitsü atema France nungi sepaitem renemshidang tangokba noksa nung angur.

PM Modi-i sensotem dang tourism ajungkettsütsü ayongzüker

Rameshwaram, Aenjeti/ January 21 (Agencies): Amongnü Ato kilonser, Narendra Modi-i sensotem dang linük nung tourism ajungkettsütsü mepishi. Gujarat nung Khodalldham Trust Cancer Hospital amenoktsü atema foundation lung azüngtsüba sentong nung jembidang Ato kilonser Modi-i linük sensotem dang tourism ajungkettsütsü densema tenangzüka 9 agitsü ayongzüker. "Ner linük atema tama bilemang. Ner linük atema nai melungba ka mezüing inyangang. Nai sodi mapang tesem kar semdangtsü tebilemba lira ner linük nung aliba tourism tesem kar semdangang, na dang masü ner kibong züngsemtemi semdangang. India nung tourism ajungkettsütsü atema nai akokba inyangang," ta pai ashi.

Tawa Modi-i Lakshadweep ya tzüküm tourism ka kumdaktsütsüla, ta ayongzüka sülen Maldives nung junior minister tem aser sorkar ketdangsertemi pa mejungi aija liasü. Iba sülen India-i Delhi nung aliba Maldives ketdangser jaoka tashishiba metetdakja liasü. Modi-isa sensotem dang tzü-jang ajak kumzüksüla aser tzü wazüka ayutsü atema nübürtem nem angatetdaktsütsüla, ta ayongzüker. "Yimtsüng ka nungi kati oa nisungtem nem digital transactions indang-a angatetdakjang. Ni asen linük nung nübürtem dang pei yimtsüngtem, kiyong aser yimitemji merükmejuba nung temaba kumdaktsütsü ayongzüker," ta pai ashi. Modi-isa, "Linük nung

yangluba osettsüsettem ajungketjang aser aluyimertem dang mozü mamshitsü angatetdakjang. Anogo shia nü chiyungtsü nung menjang-a densemang. Ni nenok taküm libaliro ka ama saisapong jangratsü ajungshir. Tongtibangtibaji, nai temesepba mozü nung pilaa liang," ta ayongzüker. Paise sensotem dang tanga linük nung masü pei linük nung kiyimba sentong agiang, ta ayongzüker. "Bendanglen kiyimtsü nungdak asü? Asenoki item ama sentongji linük nungbo magitet asü? Kodang asenoki tanga linük nung kiyimdir ibaji ajanga asen meyong sen agi bendanger senpong ang süngtsür. Bendanglen oa kiyimba ya anentsüla. Ibayongji ni ajak dang India nung ang kiyimtsü ayongzüker," ta paise ayongzüker.

Tanü UNGA Tir, Dennis Francis-i India semdangtsü

New Delhi, January 21 (Agencies): January 22, 2024 nü United Nations General Assembly (UNGA) Tir, Dennis Francis-i India semdangtsü. January 22 nungi tenzüka January 26 tashi India semdangba mapang nung Francis-i New Delhi, Jaipur aser Mumbai semdangtsü. Pai External Affairs Minister, S Jaishankar-a ajurua senden amentsü. Anogo pongunü India

semdangba mapang nung pai tongti ketdangsertem aser lokti balala nungi lenirtem den senden amentsü aser sentong aika nung shilem agitsü. New Delhi nung Francis-i S. Jaishankar den senden amenba mapang nung alima tensa atema jembiba den külemi India-i United Nations nung shilem agiba atema o lemteptsü. Francis-isa New York nung ayongzüka Sustainability Week (15-19 April 2024) nung shilem

agitsü aser September nung ayongzüka aliba Summit of the Future nung adentsü atema India jaoktsü. Francis-i Raj Ghat semdanga Mahatma Gandhi nem akhüm agütsütsü, Indian Council of World Affairs nung o jembitsü aser Digital Public Infrastructure indang sentong ka nung jembitsü. Francis-i Jaipur-a semdangtsü aser tesüsa Mumbai semdanga sentong kar nung adentsü.



January 21, 2024 nü Ranchi nung Enforcement Directorate (ED) ketdangsertemi Jharkhand Chief Minister, Hemant Soren dang asüngdangyaba sülen United Progressive Alliance (UPA) MLA temi pa agizükba noksa nung angur.

April ita mezüing hopta nung Telangana nung LS election agitsüa akok

New Delhi, January 21 (Agencies): Amongnü Union Minister, G Kishan Reddy-i, April ita mezüingbuba hopta nung Telangana aser Andhra Pradesh na nung Lok Sabha election agitsüa akok, ta metetdaktsü. Paise, BJP-i Lok Sabha election atema renemdar, aser Narendra Modi tang agi tasembenbuba Ato kilonser aküimtsü, ta metetdaktsü.

iba denji külemi linük nung bomb lendong mali, tamangba lokti tsüingda rara mali aser (Pakistan nunger itdangitba agency) ISI mapatongtem mali, ta paise ashi.

Union Minister Reddy ya Telangana nunga BJP Tir lir. 2019 küm agiba Lok Sabha election apibo April ita mezüingbuba hopta nung Andhra Pradesh aser Telangana na nung election agitsü, ta paise metetdaktsü.

"National highways aser aluyimba densema sector aika nung terenlok lir. Sorkari Arlla 370 aser triple talaq agienba densema tongtibang telemteba aika agiogo," ta pai metetdaktsü.

"Narendra Modi lenisüba kübok onoki tang agi tasembenbuba election nung tokteptsü. Taruba ita election agitsü atema sangdong agütsütsü. Parliamentary elections atema onok renemdar," ta pai ashi.

"Tesüiba küm 9 ser tesadang tsüingda sorkari sensakertem atema ki crore 4 süja lemtsüogo. Telangana nung taoba BRS sorkaribo sensakertem nem ki magütsütet," ta pai ashi.

Paise, UPA sorkar aliba mapang nung ochimashi ken otem nung Union Minister tem jail nunga puoka liasü, ajisüaka tesüiba küm 9 ser tesadang tsüingda Ato kilonser Modi leniba kübok tang sorkarbo tashitait aser ochimashi mali, ta ashi.

Telangana nung BRS menüingdak, nenoki Lok Sabha election nung BRS nem vote agütsüra amajok dang asütsü, ta pai ashi.

India ya alima nung rongsenkettzüng tulutiba linüktem rongnung jenjang 5buba kümogo,

Teloktep tenüing nung party tilatemi sorkar kümra linük timtemtsü; Modi lenisüba kübok dang sorkar tashi itta alitsü, ta pai ashi.

Amongnü Kishan Reddy-i National Skill Training Institute for Women NSTI (W) semzüka liasü. Iba sentong nung jembidang pai, tetsürtem nem tashi agütsütsü atema Centre sorkari kanga tongtibang süa inyaker, ta metetdaktsü.

Reddy-i, tetsürtem nem tashi agütsütsü atema NDA sorkari scheme aika tenzüksüogo, ta ashi.



January 21, 2024 nü Ayodhya nung aliba Ram tekülem kidang tongti putir, Acharya Satyendra Das-i osangbenertem den jembidang tangokba noksa nung angur. Ram tekülem ki ya Hombarnü semzüksü.

India nungi apusoba Russia nunger tayimtsü ka Afghanistan nung tsükok

New Delhi, January 21 (Agencies): Amongnü Russia nunger ketdangsertemi, Honibar nikongdang India nungi Uzbekistan adena Russia-i apusoba compact charter tayimtsü ka Afghanistan nunger anüing nung teyimdak mapang radar screen nungi sama, ta metetdaktsü.

Tayimtsüji Uzbekistan nung khen anenzükba sülen Russia tonga aotsü tebilemba liasü.

France nungeri yangluba Dassault Falcon 10 tayimtsü nungji 'crew' züngsem pezü aser passenger ana liasü.

Osang angazükba agi, tayimtsü nung passenger anaji Russia nunger apuani liasü aser kabo kanga mejungi teshirangdak treatment tagidak anir senzür liasü.

Iba tayimtsüji Afghanistan kübok Badakhshan nung tsükok, ta Afghanistan ketdangsertemi metetdaktsü.

Ketdangsertemi ashiba agi, tayimtsü tsükokba tesem 'Badakhshan province' ya China, Tajikistan aser Pakistan den arrtsülen lir.

Afghanistan nunger ketdangser kati, "Tayimtsüji Badakhshan province nung tsükokogo saka tesembo tang tashi junga mejangjar. Onoki team kar yokogo saka parnok tang tashi meyipa maru," ta metetdaktsü.

Russia nungertemi iba tayimtsü tsükokba kuli bushisüngdang tenzüko.

Tayimtsüji 1978 küm yangluba lir. Tayimtsüji mezüing Thailand nungi apusoba sülen India nung anenzüka totzü inokshiba sülen apuso.

Atletik Grup LLC indang tayimtsüji India kübok Gaya nungi apusoba liasü.



TIR YIMYIM YIMOBILEM (EDITORIAL)

DIMAPUR TENTONÜ, JANUARY (AENJETI) 22, 2024

Asen lima shia arudaktsütsüla

Küm 50 jakdang asen lima ajaklen gari lenmang lapokyonga ao, school tenzük, mozü kitem lapoktsü, light aru, paper mill, sugar mill aser plywood factory lapok aser Tuli tashi train arutsü tenzük. Iba mapang nung gari lenmangtem nisung teka agi jambol, koterang aser alinungtsü amshia atu, electric light arubaji aonung tesangwa asoshi dang amshi, school lapokbaji government mapa inyaksü angazükdaktsütsü lapoktsür ama bilem, mozü kidang inyakertemji nübortem asoshi tangutsü taneptsür Tsüngrem liasü aser mill-tem lapokbaji mapa inyaksü atema masü saka ita sen chia alitsü atema maongka balaka agütsür amai bilem aser asen limai train atuba tajangzükji asenoki memeteti liasü, anungji magitet. Joko, item inyakym aser tangatetba nungi asenok talangka inadokogo aser tangbo küm 50 jakdang government-i inyaksüba mapatem ajak to asenoki inyaksüsa kümogo. Aji oda, terenlok mapa inyaksübaren nunga government tashi tilaba aser nübortem tashi tuluba ta kümogo. Atangji, tanüa gari lenmang aser electric light-bo government-i inyaksütsüsa akümer, ajisüaka küm 50 jakdang nisung noklang kati ita junga inyakba mapa to tanübo machine agi anogo ka nung renema inyaker, Kasaji, tanübo electric light nungdakbaji aonung tesangwa asoshi nungdakba dang nungibo anungdang mapa inyaksü asoshi tenungdakba kümogo. Aji oda, joko asenoka anogo shia bendang tesem balala nung pei nungdak atema oli aruli jajatsü nungdak teimba –teimba adoker aser rongsen bushiba tsütsüa tangbo asenoki asen akaba süng aser lung agi dena sen kuma yokzüksü metetogo. Iba ama mapang ka nung Business Association of Nagas (BAN) teloki Dimapur nung Trade Expo aliba mapang yakanü tayimtsü aser train senzüba mapatem nungi dena ketdangsertem jaoka sensaksem akaba mapang Nagaland nung Dimapur nung tayimtsü anendak aser Tuli nung train jajaba tesemtem ulushia yanglutsü nungdakbatem indang jembibaji asen lima shia arudaktsütsü asoshi tongtibang mapatem reprangteta jembiba mapa ka asütsü. Joko, küm 50 jakdang lapokba lenmang aika menendoka lir, tang tashi asenokbo light tashi agi meperi kangshir, government school aika tazüng kümogo aser government mozü aika nung nübortem meyaritetter, government-i lapokba mill ajak shibangogo aser Tuli tashi khu abenba train tatsütsü atuba jagi asenok nem shitakba teyaribo magütsütetter. Atangji, akhidang amato tanü putu yabo government-i dang industry dena lapoktsüa nübortem yariba putu masü, kechiyong government meyong osetji shinga meyong oseta masü akümer, anungji yimten aser lokti lenirtemi anir lanur aser kaketshirtemi asen lima takar kümdakja shia arudaktsütsü asoshi tangar temeteterem nungi shisatsü agia peisasa pei akok mapa tenzüka inyaksübaji kanga nungdak kümogo. Train atutsüjia aser aser Dimapur tayimtsü anendak ulushiba den ano asen lima Tuli aser Tzurangkong ama nunga train dang masü tayimtsü anendak dena yanglutsübajia teinyakbo government-i inyaksü saka asangsang nung ataloktsüsa inyaksübajibo asenok nübortem asütsü. Item mapatem nung lenisüba agütsütsüba nübortemji tangar dak imlatsüba masü saka asen yimtak yimsüng nungi tenzükter asen tzükong aser asen Aor sasep nung lokti tentet zünger mezüngma tenteta alibatem nung lenirtem asütsü. Item lokti lenirtemi pei lima shia arudaktsütsü atema tang BAN teloki nungdakba nisungtem jaoka shisalemsatepba ama shisalemsatep tenzüktsüla. Iba jagi asenok nem asen lima shia arudakja mapa inyaksü atema inyakym (idea) sayutsü. Ibaji atema lokti tentettem tama shia arur pei lima asoshi rongdak nungdak jembia tenzükangma.

OLEMSABANG

Tsüngrem mapa nung tenzükba temoatsü aser atakatem

~ L. Kika Pongener.

(Yashi adok nungi...)

Ano arogo kar nungpo, pei chirnur ki-ayimtsü, mokü-lar/yi-lar kar 'Counselling' agidaktsütsü aser kibong nung tebilemstü khuret kar lemsateptsü atema... Toklang tenzükter kar ajuruner sernung 'Appointment' monguteti küm suidaktsüba otsü-a angazük... Aji oda, Khristar arogo nung, Tsüngrem tenzükertem ajurutsü atemabo 'VVIP' kar ajurutsü amai kanga sak-saka masü nungbo kanga jungla. Ajak dak alaka... Tsüngrem tenzükertem tenzükba mapa nungi 'Retirement' atema pei tasoba anogo/küm metetsümonga aibelena tiyakü kari amshia lira... Ajibo metetsümonga Tsüngrem tsüngdang aibelener masü naa...!!!???

Tanü arogotem nung Tsüngrem lartem aikati pei ajaba kanga junga mangatet asü masü'ar...Pei tenzükba arogo nung kipoksem aotsüji, pa/la mapa masüa ta angatetba...Evangelistic Committee lir-ji...Home Evangelist lir-ji ta ser...Office nung dang mena kaküba tenzükter karbo alitsü akok...!!! Tanü arogotem nung lanur aika Degree tulu künger mapa manguba agi taküm tia raksar, karbo mokü-lar/yi-lar kümer lir...ano karbo anepdang nungi aonung tashi room nungi madok, Mobile Phone amer anogo suidaktsüba...Yiar amai kümer aliba aiur-asangur aika lir. Item lanurtem dangi tsüngdong oa, Tsüngrem o ashitsü lanur lennirtem khuret tulu lir. Ajisuaka, tesusatsüka, Youth Pastor/Youth Director-tem aikati, kipoksem aotsüji pa/la mapa masüa ta angateter... Ayung-ayunga office nung dang mena kaküba tenzükter karbo alitsü akok. Tanü takar arogotem kar nungbo Youth Pastor/Youth Director liaka, ano 'Youth Evangelist' kiyong shia nung ayur. Anungji Home Evangelist & Youth Evangelist-temji aliyongjia...Toklang tenzükter ajaki pei santem kipok shia oa mapang kar nungbo semdangtsüla aser pei santem rongnung shibaji shiba (?)...aji meteta alitsü kanga tongtipang lir.

Tsüngrem lar Peter-i ashiba ama...Tsüngrem tenzükter ajaki pei ajaba aser shimtetba shitak meteta tenzüktsüla (2 Peter-1:10)...Anungji akümesena masü, nemnem-shinema masü, tulu shisanga masü... Saka ajemalua tila kümer ajak den küsa liteta, Tsüngrem tsüngdang aser arogopur tsüngdang sentsüh masütsüsa bendanga aguja aser nendak-nendaka tenzüktsü atema shimtet aser jatet...ta angateta tenzüktsüla. Yisu-i ashi... "Nisung chir-i tenzükdaktsütsü masü; Saka tenzüktsü aser aika alang pei taküm agutsütsü aru" (Mathi-20:26). Küm aika Tsüngrem tenzüka arur temoatsü masü, saka atakadem-ang ajangzüktsüsa tenzükttetra...Kangasa tesusatsüka asütsü. Asenoki tanü India lima nung Tsüngrem tenzükertem aser Khristan-tem reshikangshiba otsü/osang angashidang...Asen lima nung Tsüngrem tenzükertem-bo iba amai jangradema sadoksadoka lidaktsür aser tenzükter sernung...Timtem touthi aser nungsen-nungmen tila-teri kata marezmüktetba ya koda...!!!???...ta aiben shisadanga sungmanga bilemer...!!! Tanü asen lima nung Khristar arogo nung tenzükertem teimba ka iba tia nungji lir... Ajioda, Tsüngrem tsüngdang sentsüh aser khuret tulu asütsü.

Tejen putu nung, Eli Putir-i pei kibong jungjunga yimsu mesütet, pei ajaba aser shimtetba mangatet aser Putir ka mapa makokba... Yongji par jabaso Hofni aser Finehas anogo ka nung külemi tongpang nung tepset. Aser iba osangji angashir Eli Putir-a pa amenba menden nungi tsüka asü. Tsüngremi Eli dak jakzükba nungi pa tenzükba mapa nung nokdaker kata malitsü...ta ashiba angur. "Kibuba Israel Tsüngremi ashir...Ni atangji ne kidong aser nebu kidongi teti kü madang jajatsüla ta ashi ; Saka tang...aji kü dang nungi talangka piladakjang" (1 Samuel-2:30). Tsüngremi Eli Putir kidong teti atema pa madang jajatsü/tenzüktsü shimtet...Saka Eli Putir-i Tsüngrem jashitsüsa tenzükttet nungji, pa dak jakzükbatem Tsüngrem madang jajatsü/tenzüktsü talangka piladaktsü. Tetekü...Eli Putir dak jakzükba chirnur aser semchi-semnur Tsüngrem den jajatsü/tenzüktsüsa kata malitsü ta ashi..."Ajiang ne kidang tambur kata malitsüsa ni ne tepen aser nebu'er kibong tepen leptoktsüogo" (1 Samuel-2:31). Eli dak jakzükba chirnur/semchir tantsür-tambur kuma arishir kata malitsüsa atakademba angur. Anungji küm talangka Tsüngrem tenzüka arur atakadem-ang angutsüsa tenzükttetra tesusatsüka asütsü.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir



January 20, 2024 nü 33buba Angami Catholic Youth Association (ACYA) mungdang aser Golden Jubilee nung tangokba noksa nung angur

Voice of the Martyrs (VOM)-i India ya 'restricted nation' ta züngshir

January 21, 2024: Khristan melungtet telok Voice of the Martyrs (VOM) indang 2024 Global Prayer Guide nung India ya "restricted nation" ta züngshia lir.

Hindu yimsü alia amangertemi Khristantem anema inyaba atema VOM-i India ya 'restricted nation' ta züngshir, ta parnok metetdaksü.

Richard aser Sabina Wurmbrand nati tentetba VOM ya interdenominational organization ka lir. Alima tesem balala nung reshikangshi ajangshiba Khristantem tenzüksü nükjidong nung tenati VOM tenteta liasü.

VOM-i, tang aliba sorkar kübok tangatetba melenshiba ajang India nung tensa ya balaka kümogo, ta metetdaksü.

2014 küm election nung Ato kilonser Narendra Modi shimtetba aser 2019 küm

election nunga maneni pa shimtetba ajang India nung Khristantem anema inyakba kanga bulua akümer, ta VOM-i sangdong ka ajang metetdaksü.

VOM-i, Modi'er administration ajang Hindutva mesüra Hindu temeja ajangkettsür, aser parnok nükjidongji Hindu linük temeja akümtsü atema lir; iba tangatetba ajang linük nung yimsü tsütsü nütsüng ajema alirtem reshikangshi tamajungba kümogo, ta metetdaksü.

VOM-i, Modi yimsüsüba kübok Hindutva ajang linük tesem ajaklen Khristantem atema tenokdangbatem benoker, ta ashi.

VOM Tir, Cole Richards-i, India nung Khristantem sempaba mesüra Khristantem anema inyakba kanga bulua kümogo, aser item ajangmesortemji aiben

yimtenren nung lenirtem asur, ta metetdaksü.

VOM-i India nung Khristantem lenmang balala ajang yarir- Laishiba agütsür, mapa makai akümertem, ki raksatsüba ajang takoksa angurtem aser yirurtem yarir.

VOM-i alima tesem ajaklen Khristantem ajangmesor, sarasademtsür aser nungita yarir.

VOM indang 2024 Global Prayer Guide nung alima tesem ajaklen Khristantem reshikangshiba osang tejangja agüja lir. VOM-i linüktem mesüra region temji telemsa (category) balala nung "restricted" mesüra "hostile" ta züngshir.

Takumbo VOM-i ano category ka bendenlokogo aser ibaji "areas of concern" lir. Iba category kübok linüktemji tang Khristantem reshikangshiba aser tensa tamajungba akümbe linüktem lir.

UK nung Evangelical lenir, Roger Forster alima nungi pilaogo

January 21, 2024: UK nung Evangelical lenir aser Ichthus Christian Fellowship neo-charismatic network tentetsang, Roger Forster alima nungi pilaogo; pa arrshi küm 90 liasü.

Forster küm 70 jungnüa Tsüngrem tenzüksü wadang nung liasü; Bodhbarnü (January 17) pa süogo, ta Ichthus Christian Fellowship (ICF)-i metetdaksü.

ICF-i sangdong ka ajang, "Pai Kibuba Yisu tenzüksüba ajang onok ajangmesor. Pa sayutsüngir ka, Laishir ka, pastor ka, tesayur ka aser talisa Yisu nütsüng ka liasü. Pa asüba atema onoki mangyimer. UK aser alima tesem ajaklen nisung meyrjang aika atema pa ta tamang tsütsü tebuti ka liasü, aser pai alizüng tonga asemogo," ta metetdaksü.

Tekülem aser tetushi lenir, Graham Kendrick aser Ichthus Team Ministry lenir, Henry George nati Forster nem tetushi agüja, Forster-i jangjangja aser tsüngro-songa Khrista osangtajung sayutsüngia liasü, ta metetdaksü.

Tanela asentenshi milak jangruba mapang ka nung Forster



Roger Forster

lanur dang liasü aser pa University of Cambridge nung azüngba mapang nung pai Khristan yimsü agizük. Iba university nung pai math aser theology azüng. Pa Royal Air Force nung tenzüksü mapang nung Kibuba tenzüksü atema pai taküm bendanga agütsü.

1974 küm Forster-i pa kinüngtsü, Faith den külemi Ichthus Christian Fellowship tenzüksü liasü. Mezüng par kidang ICF tentetba anogo nung nisung 14 dang liasü saka parnok mangdangji tejangja liasü, ibayongji tanübo iba telok nung züngsem aika kümogo.

ICF ya mezüngbo house

church tilaka dang liasü saka tangbo London tesem balala nung ICF kübok Arogo aika lir.

Forster-i nütsüng tiemba akümtsü atema dang masü saka tamang jenjang indaktsütsü atema kanga nendaka tenzüksü. 1980s nung pai leadership training program ka tenzüksü liasü aser iba program kübok Tsüngrem tenzüksü atema nisung noklang aika nem training agütsüogo.

Pai sayutsüngiba ajang Lebanon, Nepal, India aser Myanmar densema linük aika nung nütsüng jenti Khrista dangi anir aruogo.

2021 küm October ita nung Forster aser pa kinüngtsü nati Henry George leniba nung nisung 8 nem ICF bendanga agütsü. Tangbo ICF indang outreach kübok "Church on the Streets," toddler groups aser refugee outreach lir.

ICF küm 50 ajangba Jubilee küm nung Forster alima nungi pilar. ICF-i pa nüngtem nung memorial service ka agitsü saka tang tashi nungbo tesem aser anogo mesangdong.

ANO GO ABEN TSÜNGREM DEN

PEI MAPA YARI TSÜNGREMI O BENDANGTSÜ

...ne mulungjangi anilen, aser ne tenük agi ajunglen oang, saka ya metetang, oda item ajak asoshi Tsüngremi na o bendangtsü. Sayutsüngir 11:96

Aseni amangba Tsüngrem ya tetokdak tekoru mesüra ain adokba Tsüngrem ka masü, saka aria bilemba aser yimlibilem nung talobusa aliba ta T. Kunem 4:24 nung reprangra "Kechiaser Kibuba nenok Tsüngremji tesamatsüba mi, tenükmba Tsüngrem lir." ta shia angur. Tetezü, ochi atangji aser teindang. Saka temenen den hai haura makaba, temenen mapa dak rangloka melitetba temeshi Tsüngrem ta tangatetba sayur.

Yihova Tsüngrem ya temeim yimlibilem agi sünga liaka, shiri temenen den hai haura kaa, teyanglur Tsüngrem anema inyaker akümer, parnok nembo, pei inyakba mapa tamajung yari o bendang agüja teti tejashidak molumi shilem lemsütsütsü, aser tajungpurtem nema pei mapa tajung yari teti tepeladak kotak senmang lemsütsütsü. Mathi 25:31-46 nung iba indang kuli tejangja zülua angur.

Kotak senmanger mesüra molumi senmanger asütsü asen sasa dang shimtsü Tsüngremi temeden agüja lir. Tanü ajangbenaka asen o bendangba tsüngdangji noktaksüsa kümra, kobala senmang ka amangtsüsa asen taküm tanela jenjang koma koda lir? Sarasadema shisadangi.

Philippines nung Khristantemi yimjung atema sarasademer

January 21, 2024: China-i nung tensa tamajungba South China Sea nung makümtsü atema January 18 ambangyima inyakba mapang nü kidanger linüktemi ka nung Khristantemi linük tongtepratepa inyaksü nung aser South China Sea jembio.

National Council of Churches in Philippines (NCCP) nung Ecumenical Relation nung tongti aser pastor, Irma Mepico-i, sorkari pua aliba communist teloktem chiokba sülenbo teti atema yimjung alitsü imlar, ta metetdaksü.

1960s mapang nungi tenzüksü Maoist telungpurtemi Philippines anema rarar. Yaküm November 22 nü Tir, aser Philippines Tir Ferdinand Marcos-i taoba mapang New People's Army züngsemtem, Moro Islamic Liberation Front züngsemtem aser tanga telungpur telok balala dang taitoka chiokogo.

NCCP aser Catholic Bishops' Conference of the Philippines (CBCP) nati South China Sea nung teti atema yimjung alitsü nungdak, ta sangdong.

January 18 nü NCCP aser CBCP nati külem sangdong ka ajang, "Tanü telemsa adoka aliba, rara aliba aser alima raksaba tensa ka nung alima tesem ajaklen yimjung nungdak," ta metetdaksü.

Philippines aser China na tsüngda tzüyim nung tesendaktep tamajungba kümogo. January 11 nü Germany foreign minister, Annalena Baerbock-i Philippines semdangba mapang nung lai Philippines pusama jembu aser China-i ambangyima inyakba atema aija liasü.

Ajisüaika South China Sea

AO OSHI ANGAZÜKDAK:
TANÜ ANGAZÜKTSÜBA OJANG



Shisa

(v) süoshi mesüra kaket amala raksaba (tear up)

* Tanurtemi kidang kaket ajak shisa.

Shisaamsa

(adj) Shsabolu tulu agi anenba (mental distress)

* Tanur tamajung akümba agi tsürabur kanga shisaamsa.

OLONG PAITEP # 6674

	1			2	3				
4			5						6
					7				
	8								
		9		10				11	
						12			13
14									
						15			

TIPILEN

- 2. Sü jeplok - (4)
- 4. O agi merenshi - (5)
- 7. Ayongküm li - (5)
- 8. Chiyungtsü mapang süiadok - (4)
- 9. Tsüngrem den jembiba - (9)
- 12. Saklok - (4)
- 14. Samaba mebushitet - (5)
- 15. Mejanga onü - (5)
- 16. Tzü shiruru ka - (4)

LANGTSÜNGLEN

- 1. _____ i - (4)
- 3. Kasa masü - (6)
- 5. Nüchi masü - (5)
- 6. Tashi endok - (5)
- 9. Langtem - (5)
- 10. Anü malidang - (6)
- 11. _____ kibur - (5)
- 13. Tebur tembar tsüngda jatepba - (4)

OLONG PAITEP # 6673 TELANGZÜBA


TIPILEN :

- 1. Ayaterm, 7. Anünü,
- 8. Aiben, 10. Kiralongrar,
- 13. Nükla, 16. Barnü,
- 17. Süngpak.

LANGTSÜNGLEN :

- 2. Yangji, 3. Tenü, 4. Mapa,
- 5. Hombar, 6. Lanur, 9. Hon,
- 10. Kanga, 11. Raktep,
- 12. Ajunga, 14. Anis, 15. Tang.

NAI-A YA METETTER MA



January 22, 2024 nü Ayodhya nung Ram Temple meshiteta lapoktsüba anogo matongdang Indian Space Research Organisation (ISRO)-i anünglak nungi satellites ajanga agiba noksa kar sayuogo. ISRO-i lemsatepba noksatem nung ali acre 2.7 nung yangluba Ram Temple kimong angur. Noksa nungsa Dashrath Mahal, Sarayu River aser Ayodhya railway station tasenba angur. ISRO-i Indian Remote Sensing series of satellites amshia noksatem agi.

Assam Minister Hazarika-i kibong 14,079 nem ration cards agütsü



Guwahati, January 21, 2024

(Agencies): Morigaon district kübok Laharighat nung Water Resources, Parliamentary Affairs, Information, and Public Relations Minister Pijush Hazarika-i kibong 14,079 nem ration cards lema agütsü.

Department of Food, Public Distribution and Consumer Affairs kübok ration cards tasen agütsü.

January 16 nungi Assam nung ration cards tasen agüja arura ser January 21 nü Minister Hazarika-i kibong 14,079 nem agütsü.

Dr. Himanta Biswa

Sarma'er sorkari mapa meranga inyakba atema pelar. Morigaon district nung yaküm flood-free kümdaktsüogo aser iba ya Water Resources Department ajanga lir, ta Hazarika-i ashi.

"State sorkari National Food Security Act kübok hunger aser malnutrition samatsütsü tenangzükba agia lir. Prime Minister Narendra Modi aser Chief Minister Dr. Himanta Biswa Sarma nati anir Centre aser state sorkartemi terenlok mapa inyakba atema tenüngsang agütsür" ta paisa

ashi.

Assam state sorkari lanur 88,000 shi ka nem sorkar mapa agütsüogo. Nübortemi scheme balala indang tajangzük agütsü ayongzük, ta Minister Hazarika-isa metetdaktsü.

Water Resources Department-i kanga dang anibelem arema Lahright constituency nung Brahmaputra ajanga ali anenzüka bener aoba noktangogo. Sorkari iba tesem renlokdaktsütsü tenangzükba agia lir, ta Minister Hazarika-isa ashi.

Congress national secretary-i Assam Congress president pusemer

Guwahati, January 21, 2024

(Agencies): Deobarnü Assam nung Bharat Jodo Nyay Yatra amakdang Congress national secretary KC Venugopal-i Assam Pradesh Congress Committee (APCC) president Bhupen Borah pusema nungit.

"Fascists-i onok amakba shiaji onok asoshi tetushi kaka lir" ta Venugopal-i ashi.

Bhupen Borah aser tanga Congress züngsemtemi parnok amakertem anema noktakba atema tenüngsang agütsür ta Congress national secretary-isa ashi.

"APCC President Bhupen K Borah aser tanga tasütait karyakartas-i BJP züngsemtem den tasü itta raratepba atema tenüngsang agütsür. Himanta'er

ochimashi yimjak nung memetdaktsütsü atema parnoki onoki amokbangtsü meranger" ta Venugopal-isa ashi.

Jamugurihat nung Bharat Jodo Nyay Yatra rally agidang Assam Pradesh Congress Committee (APCC) President Bhupen Borah lendong nungi jenbu. Borah-i Rahul Gandhi'er gari nungi aludang amak.

Manipur CM-i Bishnupur district nung khaseter kibongtem semdang



Imphal, January 21, 2024

(Agencies): Manipur Chief Minister N Biren Singh-i tawa Bishnupur district kübok Ningthoukhong nung khaseter kibongtem semdangogo.

"Sorkari aibelenertem apütsü aser temeten agütsütsü tenangzükba agia lir" ta Manipur Chief Minister-i ashi.

"Ningthoukhong nung tasür kibongtem semdangogo. Ni

parnok den asükhu lemsateper. Iba ama temulung raksaba mapang ka nung sorkari parnok nem akokba tashi teyari agütsütsü aser aibelenertem pua merenshitsü tenangzükba agir" ta N Biren Singh-i ashi.

January 18 nikongdang 3.45 meta Bishnupur district kübok Ningthoukhong Kha Khunou nung tebu o jabaso na dena aluyimer pezü khaset.

Parnok khaseterem ya Lamlai Kabui village nungi alu aser kilometre 2 shia arur alu tiyongtsü nung aliba water supply plant ka nungi civilian 4 khaset ta osang angazük.

Kasa anogo January 18 nü Kangpokpi district kübok Kangchup nunga village volunteer ka khaset. Iba lendong nung nisung asem yirua lir.

Palestine nem state magütsünübaji agizüktsü makok: UN Chief



Kampala nung January 20, 2024 nü Non-Aligned Movement (NAM) indang 19th Summit of Heads of State and Government tembangba sentong nung United Nations Secretary-General Antonio Guterres-i jembidang tangokba noksa nung angur.

Kampala, Aenjeti/January 21 (Agencies): UN Secretary-General Antonio Guterres-i Honibarnü Uganda nung Non-Aligned Movement summit nung o jembiba mapang, state yangertsü atema Palestine nungertem temeden ajaki agizüktsüla, ta ashi.

"Israel aser Palestine nunger atema two-state solution agizüktsü memulungba aser Palestine nungertem nem statehood magütsünübaji agizüktsü makok," ta UN lenir yagi Uganda yimtiba Kampala nung jembiba mapang ashi.

"Iba amala tangatetba ajanga mangatetep tali atsülangyonga aotsü, koba alima yimjung aser security asoshi amokmeren tulu ka kumogo. State yangertsü atema Palestine nunger temedenji ajaki agizüktsüla," ta Guterres-i ashi.

October 7 nü Hamas teloki Israel amakba sülen Gaza nung rara tenzüka liasü. Iba anogo Hamas puri Israel nunger 1,140 shi tepset aser asürtem

rongnung timba civilian tem liasü. Iba sülen Israel-i tanen makai Gaza maka arudar aser Hamas sorkar health ministry-i ashiba agi tang tashi nung Gaza nung nisung 25,000 dak tema tepsetogo.

Non-Aligned Movement summit nung, Gaza Strip nung Israel nunger sepaitemi taochi makai inyaksangshiba atema Non-Aligned Movement-i aitsüogo aser teti asoshi humanitarian ceasefire ka benoktsü ayongzükogo.

Summit nung shilem agiba lenirtemi Palestine nungertem nem nüjiso agütsütsü aser East Jerusalem ya parnok yimtiba sür state ka amenokdaksütsü ayongzükogo.

Non-Aligned Movement nung linük 120 dena lir, shirnok tongtibang power bloc ka nung danga sendaka mali. Züngsemtem rongnung India, Iran, Iraq aser South Africa nungera densema lir.

Kasa mapang nung World Health Organization (WHO)

Gaza nung nüburtem talitsü jenjang kanga mejungi kümer aliba lemsatepogo aser Guterres-i Honibarnü meimchir temeden dak ajemdaker Gaza nung ceasefire benoktsü ayongzükogo.

Israel nem teyari agütsür tongtiba United States-ia Palestine nunger atema state balaka kümtettsütsü aspshi pusema jembio. Tawa Israel Ato Kilonser Benjamin Netanyahu-i Palestine nunger atema state balaka mamenoktsütsü ta shiogo, koba Ameica-i aitsüogo.

Rara tembangba sülen Gaza ya kechi koda achaayangtsü ta asüba dak sendakba nung mangatetep adoker aliba mapang ka nung Biden aser Netanyahu na Hokolbarnü jembio. Washington-isa, Palestine nungertem civilian tem kümzüka toktsütsü aser Gaza nungi Hamas pur raktoktsü merangba mapang tashiyim amshiba ya ajemshitsü ayongzükogo.



Russia nung St Petersburg yimti anasa gas export terminal nung mi adoka apokba sülen ketdangsurtemi mi remsepba noksa nung angur. Iba mi ya remsepogo aser nisung yiruba mali. Iba mi adokba kuli memetet, saka iba tesem anasa drones kar angu ta yangji aliba osangbener temi ashir. Ukraine-i kodanga iba ama lendong agütsüba menanzüker, saka Kyiv-i inyak ta Ukrainian media ajanga ashir. Tang rara nung Russia aser Ukraine nati drones amshir.

Putin-i yakta Pyongyang semdangtsü mulunga lir: North Korea

Pyongyang, Anejeti/January 21 (Agencies): North Korea nunger lenir kati ashiba agi, Russia tir Vladimir Putin agizüktsü atema lar linük renema lir, ta state media sangdong ka ajanga Deobarnü metetdaksü. Iba ajanga linük ana tesendaktep tali akangshiba sayur.



Vladimir Putin

Russia aser North Korea ya yakta nungi sendaktepa aruogo aser tang tesendaktep akangshitsü merangba mapang ka lir aser North lenir Kim Jong Un-i taoba küm September ita Russia semdanga Putin den ajurutepogo.

Russia-i Ukraine amakba pusemsü atema Moscow aser Pyongyang la longjemer inyaker ta shia anüolen aliba linüktemi linük ana ya aitsüogo. Anüolen aliba linüktemi North-i Russia nem artillery shells aser prangbong meyirejang aika agütsür alitsü ta amanger. North Korea foreign minister Choe Son Hui-i taoba hopta Moscow semdanga Putin aser Russia foreign minister Sergei Lavrov den sensaksemogo.

North Korea sorkari tir Putin Pyongyang-i pelashishia agizüktsü aser Korea nunger tembar ya agizüktsü atema renema lir," ta Choe-i Putin ta ashiba foreign minister indang assistant office-i metetdaksüogo, koba Korean Central News Agency-i sangdonga liasü.

Putin-ia, DPRK tekaratiba nung semdangtsü mulunga aliba lemsatepogo. Kasa sangdong

ajanga ashiba agi, Ukraine den raraba mapang parnok nongita yariba atema Russia-i kanga pelaba lemsatepogo.

Russia aser North Korea na tsüngda military aser rongsenketzung dak sendakba nung tesendaktep tali akangshiba ya Washington aser Seoul nati kanga süoki ia agir. Moscow indang defence aser foreign minister densema Russia nunger ketdangsur tongtibangtemi taoba küm North Korea semdangogo aser iba ajanga Kyiv den sendaktepa aliba linüktemi linük ana tsüngda prangbong injang belenteper asütsü ta bilemba lemsatepogo.

Iba ita White House-i, Russia dangi ballistic missile aser launcher tem yokba atema Pyongyang aitsüogo. South Korea-ia, military satellite technology dak sendakba nung shisatsü melena Russia nem artillery injang million ka agütsüba atema Pyongyang aitsüogo.

Iraq nung missile amshia amak, US sepai aika yiru

Baghdad, Aenjeti/January 21 (Agencies): Iraq anüolen tayimtsü anendak tesem ka nung missile agi amakdang US mitkar aika yiru.

US mitkar indang Central Command ajanga ashiba agi, Iran-i yariba telungpur temi Al Asad airbase nung ballistic missiles aser rockets amshia Honibar aonung amak, kong American sepaitem alir.

US sepai aika 'traumatic brain injuries' atema temang tendangba mapang lir.

Iba lendong nung Iraq sepai ka densema yiru.

Iba tesem nung amakba ya Islamic Resistance in Iraq ta ajaba telok kati tenüng agiogo. US nung aliba Washington Institute for Near East Policy ajanga ashiba agi, iba telok ya 2023 küm tatemlen poktet aser yangi Iran den sendaktepa aliba telok balala lir.

Tawa parnoki US sepaitem dak amakba tenüng agia lir. Aser Al Asad base ya aiben amaker.

US mitkar temi ashiba agi, Honibarnü khaloktsüba missiles ya timba khazüka yok saka kar air defences nungi jenbua iba

tesem nung kongshi aser teraksa agütsüba asadanga mapang lir.

Taoba küm October ita Israel-Gaza rara tenzüker region nung Iran indang 'proxy' temi Iraq aser Syria nung US sepaitem alidak aiben yamai maka arur.

Red Sea nung Houthi nungeri missile amshia khu abenba rong amakba anendaksütsü asoshi US mitkar aser allies temi shilem agia arur.

US sepaitemi Honibarnüa Houthis dak tayimtsü amshia amak. Houthis ya Iran-i yariba telungpur telok ka lir aser Yemen anüolen tesem tuluba iba telok kübok lir. US mitkari ashiba agi, Gulf of Aden nung tenük yoker amaktsü renema aliba anti-ship missile dak amak.

Tawa Iran mitkar temi Syria, Iraw aser Pakistan nung missile amshia tesem balala makyonga arur.

Honibarnü Syria yimtiba Damascus nung tayimtsü amshia amakba atema Iran-i Israel dak tai tongloktsür, kong Iran sepai züngsem pongu asü.

Australian Open: Sabalenka, Gauff, Sinner & Fritz quarter-i iogo



Sabalenka



Gauff



Sinner

Aenjeti/January 21, 2024 (Agencies): Tang asaya aliba Australia Open tetsür kija asaya nung defending champion Aryna Sabalenka aser Coco Gauff nati Deobarnü pei tata asaya koka quarter final-i iogo.

No. 2 Sabalenka, shibai taoba küm iba asayamung nung mezüngbuba Grand Slam koka liasü lai, Amanada Anisimova 6-3, 6-2 agi akok aser Gauff shibai taoba küm September ita U.S. Open koka mezüngbuba Grand Slam akok lai Magdalena Frech 6-1, 6-2 agi koka liasü.

Anisimova-i taoba mapang asaya pongu tashi nung Sabalenka koker liasü saka Deobarnü la asoshi Belarus tsürila ya kanga jungrara liasü shiba winner 18 tashi ngua liasü.

Kasa mapang nung Gauff-i Rod Laver Arena nung Frech

minute 63 nung dang kokatok aser tetsürtem rongnung la mezüngbuba quarter-i ia liasü.

Gauff taruba asaya Marta Kostyuk mesüra Maria Tomafeeva den asayatsü.

Kasa asayamung tebur kija asaya nung Deobarnü Jannik Sinner-i taoba küm iba asayamung semi-finalist Karen Khachanov tsükdakja quarter-i iogo.

Arishi küm 22 tain fourth seeded asayar yagi tetenzük nungi kanga junga asaya-a pa nokdangtsü atema tamakoktsü liasü aser pai asaya nung set ka danga mekokdaksüi 6-4, 7-5, 6-3 agi akok.

Quarter final nung pa Australia nung asayar Alex de Minaur mesüra Russia nung Andrey Rublev den asayatsü.

Tebur kija asaya nungsa America nung 12th seed asayar Taylor Fritz-i taoba küm Australia Open runner-up Stefanos Tsitsipas tsükdaktsüogo, aser pa quarter-final nung defending champion Novak Djokovic den asayatsü.

Mezüngbuba set anabo asayar ana kanga toktepa asaya ajisüaka Fritz-i asendenshir tajungba asayateta pai asaya -6 (7/3), 5-7, 6-3, 6-3 agi koka liasü. Tena tsünga ghonda asemsür ta asaya liasü.

Maneni Novak Djokovic shiba Grand Slam 25buba akoktsü atema meranga asayadar pai Deobarnü Adrian Mannarino kokogo.

Serbia nung asayar yagi Rod Laver Arena nung iba asaya 6-0, 6-0, 6-3 agi ayong ayonga koka liasü.

Pakistan vs New Zealand: Pak-i T20I asaya 5buba kokogo

Aenjeti/January 21, 2024 (Agencies): Deobarnü Pakistan aser New Zealand na tatembangbuba aser 5buba T20 asaya nung Pakistan nung spinner temi kanga junga asaya parnoki asaya run 42 agi kokogo.

Asayamung 4-1 agi mekokaka Pakistan team-i asayamung takok nung tembangtetogo, kechiyong parnoki run 138 kanga junga defend süa liasü. Asaya nung NZ team-i run 92 dang yanglutet.

Pakistan team nungi off spinner Iftikhar Ahmed-i kanga jung asaya-a pai run 24 agütsür wicket 3 agia liasü. New Zealand team nung Kane Williamson, Devon Conway aser Daryl Mitchell nung amalibatsmen tem maliba ajanga team tashi meiti liasü, aser parnoki ball turn asüba kanga junga masayatet.

NZ pur batsmen tem rongnung Finn Allen (22) aser Glenn Phillips (26) nati dang run 20 alema yanglutet aser Pakistan-i tetesabuba wicket ti ya run 39 dang yangludaktsür

out süja liasü. Left-arm spinner Mohammad Nawaz-i (W-2; R-18) asaya tetenzüklen kanga junga ball ona pai Rachin Ravindra aser Will Young na out sütsü aser Shaheen Shah Afridi-ia run 20 agütsür wicket 2 agia liasü.

Asaya tetenzükibo New Zealand team-i iba asayamung nung asaya ajak okshia akoktsü ta bilemba liasü, kechiyong parnok rongnungi Tim Southee, Matt Henry aser Lockie Ferguson aser spinner Ish Sodhi nungeri ball kanga junga ona Pakistan team nem run aikabo meyangludaktsü.

Southee, shiba T20 cricket nung wicket timtiba agiba asayar lir pai asaya tetenzüklen tongtibang wicket agi aser over 13buba nung Fakhar Zaman out sütsü shiba kanga junga asaya liasü.

Haseebullah Khan, Zaman aser Mohammad Rizwan nungeri asaya kanga junga tenzük ajisüaka tanungba asayartemi junga masayateti parnoki run 138 dang yanglutet.

India Open: Tai Tzu Ying-i tetsür kija asaya kokogo



Aenjeti/January 21, 2024 (Agencies): Deobarnü India Open badminton asayamung tetsür kija asaya final nung Tai Tzu Ying-i asaya amokbanger asaya-a Chen Yu Fei straight-game nung kokogo.

Taoba world number one Chinese Taipei tsür, shiba iba season tembangba sülen asaya nungi anentsü lir, lai final nung cross-court smash aser drop shot kanga junga asaya-a China tsürila ya 21-16 21-12 agi koka liasü, koba Tokyo Olympic final asayashiba liasü.

Tokyo nungbo Chen-i takok angu ajisüaka Deobarnü final nung Tai Tzu-i la kechiba tetsürtem rongnung asayar tajungtiba ka ta züngshir aji sayua liasü.

Kasa asayamung tarep

temeyoktep asaya final nung Thailand nung tarep Dechapol Puavaranukroh aser Sapsiree Taerattanachai nati China nung World No. 5 tarep Jiang Zhen Bang aser Wei Ya Xin na 21-16, 21-16 agi koka liasü.

Maneni tebur tarep asaya nung India nung tarep Satwiksairaj Rankireddy aser Chirag Shetty nati kanga meranga asaya ajisüaka tenati South Korea nung tarep Kang Min Hyuk aser Seo Seung Jae na makok.

Tebur tarep asaya final nung mezüngbuba set bo Satwik aser Chirag nati akok ajisüaka tenati tanungba set ana mekokteti Kang Min Hyuk aser Seo Seung Jae na nem 21-15, 11-21, 18-21 agi asaya kokdaksü.

Harry Brook India den Test asaya nung masayatetsü



Harry Brook

New Delhi, Aenjeti/January 21 (Agencies): England's Cricket board (ECB)-i Deobarnü sangdong ka ajanga jurila maparen kar aliba ajanga Harry Brook-i pa India den asayatsü aliba Test nung masayatetsü ta osang agütsüogo, ta metetdaksü.

Kasa mapang nung ECB-i, Brook melena Deobarnü middle-order batter Dan Lawrence team nung züngoksemogo.

"Brook'er kinungertemi parnok minprong masütsü atema mepeshia asüngdangogo," ta ECB-isa ashi.

"Iba dak sendakba nung

ECB aser par kinungertemi media aser nüburtem dang parnok tejangraba akümtsübuttsü aser parnok minprong masütsü mepeshir," ta kasa sangdong ajanga metetdaksü.

India den test asaya metenzük tsünga Abu Dhabi nung oa England team preparatory camp ka akaba nung Brook-ia shilem agia liasü.

Brook, 2022 küm mezüngbuba South Africa den test asaya aser pa tatemsa England team nungi 2023 küm July ita Australia den Oval nung asaya liasü.

Arishi küm 24 tain Yorkshire

batsman yagi linük team nungi tang tashi nung Test 12 asaya lir aser iba mapang run 1181 yangluogo. Pa indang average 61 lir aser pai century pezü aser half-century tenet yanglua lir.

Brook-i kanga junga asayaba ajanga England team-i 2022 küm Pakistan den asayamung akokba nung teyari tulu agüja liasü, Iba asayamung nung pa nem Player of the Series naroküm agütsü. Pai iba asayamung nung innings pongu nung run 468 yanglu aser pa indang average 93.60 liasü.

India aser England na Test asaya pongu asayatsü lir, koba Hydreabad nung Brehostibarnü tenzüktsü.

BILEMDANGANG

"Ochi agi nisung ka nem nüjiso agütsür."